

解放 ê 承諾

「所以，lín tiòh 去招萬民來做我 ê 門徒。Tiòh 奉天父、Kiáⁿ、聖神 ê 名 kā in 洗禮。」(《全民台語聖經》馬太福音 28:19)

大使命 (the Great Commission) 是偉大 ê，m̄-nā 是因為它 ê 規模大(「所有 ê 國家」)，而且 mā 是因為它是非常重要 ê(「做門徒」)。耶穌講：「去，去做我所做 ê，照我 ê 行踏去做。」

Hiah-ê 是基督徒 ê 起行令。咱 tiòh tī 咱家己 ê 社區做工，mā tiòh 奉基督 ê 名 tī 所有 ê 國家做咱 ē-tàng 做 ê 工。咱 ê 氣力會 tùi 耶穌基督 ê 同在來，因為祂有應允講：「我 beh tiāⁿ-tiāⁿ kah lín 同在。」

咱 bē-tàng 所有 ê 人 lóng 去秘魯 á 是去菲律賓，去 kah 博愛之家 (Habitat for Humanity) 做伙起造厝宅。M̄-koh，咱 ē-tàng 查明 tī 咱熟似 ê 人中間啥看起來是孤單 á 是有苦難 ê，咱 ē-tàng 用基督徒疼 ê 精神來幫助 in。

咱 mā ē-tàng 問講：「我 ê 心內對啥人有不滿 á 是敵意？」咱 ē-tàng 求上帝 hō 咱有寬諒 ê 心靈，thang 消除咱生活中 ê 仇恨 á 是不滿。Án-ne，上主會 tī 咱中間引進友誼，甚至是疼；即使早前咱認為 chit-ê 人並無值得咱 kā 伊寬諒。

上帝有 hō 咱機會用積極 kah 敢冒險 ê 態度，來示範咱對基督 ê 信仰。有 chit 種 ê 承諾 kah 示範，咱 chiah ē-tàng 得 tiòh 滿足。這並 m̄ 是咱 tiòh 限制家己 ê 問題，雖然有 ê 人聽 tiòh chiah-ê 話 ê 時，會有共同 ê 驚惶，想講 in tiòh 限制家己，所以 in 講：「我無 beh 改變 siuⁿ chē」，á 是「我無 beh 限制我 ê 生活 tī 一 koá 嚴格 koh 死板 ê 基督教教義。」

Tú-tú 倒 péng ê 是，基督應允咱，當咱 kah 祂合作 ê 時，咱會有 koh khah koân 程度 ê 自由，會超越咱所知 ê 任何物件，而且 koh 有超過咱理解 ê 喜樂 kah 平安。

祈禱：上帝 ah，願我跟 tòe 基督 ê 承諾 bē 成做限制，卻是神聖 ê 解放。求祢幫助我變成 koh khah 有創新精神 kah 積極性，來走 chhōe 機會事奉別人，án-ne，我 kiám-chhái 會 chhōe-tiòh koh 享受比我所知 ê 任何物件 koh khah 好 ê 生活。願我通過基督 kah 上帝建立 ê 關係 ē-tàng 保護我，而且 hō 我變成 koh khah 美好。阿們。

(2002.01.06)